



## Ársskýrsla Slökkviliðs Ísafjarðarbæjar 2024

### Almenn starfsemi

**Stefna Slökkviliðs Ísafjarðarbæjar er að slökkviliðið sé alltaf tilbúið til útkalla. Við erum björgunarlið fyrir alla bæjarbúa og gesti.**

Fjórir starfsmenn eru í fullu stafi hjá slökkviliði Ísafjarðarbæjar. Þeir sinna öllum störfum sem koma inn á borð slökkviliðs, svo sem sjúkraflutningum, eldvarnareftirliti og slökkvitækjaþjónustu. Einnig að skipuleggja æfingar og endurmenntun fyrir aðra slökkviliðs- og sjúkraflutningamenn.

Í slökkviliði eru starfandi 55 slökkviliðsmenn; 25 á Ísafirði, og tíu á hverri útstöð slökkviliðsins á Suðureyri, Flateyri og Þingeyri.

Einnig eru sex slökkviliðsmenn í Súðavík og 25 í Bolungarvík, sem eru í umsjá Slökkviliðs Ísafjarðarbæjar samkvæmt þjónustusamningi.

Starfsstöðvar sjúkraflutninga eru tvær; á Ísafirði og Þingeyri. Þrír sjúkrabílar eru á Ísafirði og einn á Þingeyri.

Á haustdögum var haldinn starfsdagur slökkviliðs og þar eru línur lagðar fyrir næsta starfsár, auk þess að leggja fram innkaupalista og æfingaáætlun slökkviliðs. Æfingar slökkviliðs fara fram einu sinni í mánuði og íþróttaæfingar fara fram tvisvar í viku undir stjórn þjálfara.

Á útstöðvum eru æfingar undir stjórn þjálfunarstjóra einu sinni í mánuði yfir veturinn.

Heimsóknir eru alltaf þó nokkrar til slökkviliðsins, sérstaklega yfir sumarið. Þá koma gestir af skemmtiferðaskipum, flestir af þeim eru slökkviliðsmenn eða fyrrverandi slökkviliðsmenn.

### Almannavarnir

Sameinuð nefnd Ísafjarðarbæjar og Súðavíkurrepps

Haust- og vorfundir eru haldnir í sameinaðri almannavarnarnefnd Ísafjarðarbæjar og Súðavíkurrepps, samkvæmt lögum um almannavarnir.

Fulltrúar frá almannavörnum og lögreglu fóru á Djúpavík á ströndum, þar var haldin flugslysaæfing á flugvellinum í Gjögri. Einnig var farið til Hólmavíkur til að undirbúa æfingu með heimamönnum. Ríkislögreglustjóri kom einnig að þessum æfingum.

Nokkrar æfingar með björgunarsveit og starfsfólki HVEST voru haldnar á árinu.

Veðurviðvaranir voru á svæði slökkviliðsins, eins og á hverju ári, ýmist gular eða appelsínugular. Ekki kom þó til að manna þyrfti aðgerðastöð almannavarna vegna þessa.

Aðgerðastöð var mönnuð í september vegna neyðarkalls úr Hornvík. Tvær útlendar konur héldu að þær væru í vandræðum en svo reyndist ekki vera, allt fór vel að lokum. Auk aðgerðastöðvar var varðskipið Þór kallað til aðstoðar vegna erfiðs sjólags fyrir minni báta.

## Slökkvistöðvar

### Slökkvistöðin á Ísafirði

Við úttekt Eflu verkfræðistofu á stöðinni á Ísafirði, sem fram fór á sumarmánuðum 2023, kom í ljós mygla á nokkrum stöðum í húsnæðinu. Margra ára leki og raki er að skila sér í myglu í veggjum og þaki og er víða um stöðina.

Bæjaryfirvöld eru að meta hvað skal gera í þessari stöðu. Staðsetning á nýrri slökkvistöð er á Suðurtanga. Búið er að setja inn í framkvæmdaráætlun bæjarins fjármagn til að ráðast í hönnun og teikningar.

Mjög mikil þörf er á nýrri slökkvistöð þar sem núverandi stöð uppfyllir á engan hátt nútíma kröfur og nú einnig vegna myglu.

Skrifstofur slökkviliðs fluttu í leiguhúsnæði hjá Regus, í gamla Landsbankanum.

### Slökkvistöð Suðureyri.

Kominn er tími á viðhald og málun innanhúss á Suðureyri.

## Heilsueftirlit slökkviliðsmanna

Undir stjórn hjartasérfræðings eru allir slökkviliðsmenn teknir í blóðprufu, læknisskoðun og hjartalínurit. Að auki er gripstyrkur mældur og rúmmáls-lungnamælingar. Þvagprufur verða teknar á þessu ári hjá öllum. Heilsuefning er að aukast og læknisskoðun að verða viðameiri hjá öllum starfsmönnum.

Reykkafarar skulu standast þrekpróf sem tekið er af þjálfara slökkviliðs og fá þá greitt þrekálag mánaðarlega.

Fjórða Covid-19 bólusetningin auk hinnar árlegu flensubólusetningar var í boði fyrir slökkviliðsmenn.

## Eldvarnareftirlit

Auknar kröfur eru gerðar á eldvarnareftirlitsmenn og fasteignaeigendur. Árlega er gefin út skoðunaráætlun og eru fyrirtæki heimsótt og skoðuð. Sum á hverju ári en önnur á fjögurra ára fresti, eftir því hvaða starfsemi er rekin í fasteigninni og hversu margir starfsmenn og/eða gestir geta verið í rýminu í einu.

Umsóknir sem berast frá sýslumanni skipta tugum á ári. Góð samvinna er á milli slökkviliðsins og byggingarfulltrúa Ísafjarðarbæjar, byggingarfulltrúa Bolungarvíkurkaupstaðar, slökkviliðs höfuðborgarsvæðisins og Eflu verkfræðistofu vegna þessa.

Farið var í eldvarnarskoðun í inndjúp, skoðaðar voru kirkjur, hótél og gististaðir.

Ný lög voru samþykkt frá Alþingi sem veitir slökkviliðum auknar heimildir til skoðunar, bæði í atvinnuhúsnæði, óleyfisbúðum og heimilum, en fyrir skoðun á heimili þurfa að liggja ríkar ástæður.

Frekari kynningar vegna aukinnar heimildar slökkviliða og eldvarnareftirlits vegna óleyfisbúða í atvinnuhúsnæði er að vænta frá Húsnæðis- og mannvirkjastofnun.

## Slökkvitækjajónusta

Seld og yfirfarin slökkvitæki eru stór þáttur í starfsemi Slökkviliðs Ísafjarðarbæjar, bæði fyrir heimili, skip og bíla.

Starfsleyfi var endurnýjað á árinu og gildir það í fimm ár.

## Útköll slökkviliðs

Útköll slökkviliðs á árinu voru 11 með mismiklum forgangi.

Enginn stóreldur eða stórtjón var á svæði slökkviliðsins árið 2024. Er þar þakkað öfluglu eldvarnareftirliti og auknum forvörnum á heimilum.

Í septembermánuði brann rúta rétt við Vestfjarðargöngin, Tungudalsmegin. Mikið lán var að rútan var komin út úr göngunum. Allir farþegar komust heilir út en rútan brann til kaldra kola. Mikil og þörf umræða um öryggi í jarðgöngunum átti sér stað eftir þetta. Fundað var með Vegagerðinni sem á og rekur göngin. Farið var í skoðunarferð til Noregs vegna þessa máls og skoðuð voru jarðgöng þar. Þetta mál er enn til skoðunar og hugsanlegar úrbætur hjá Vegagerðinni.

Árlegar rýmingaræfingar voru í grunn- og leikskólum.

Útköll voru vegna umferðarslysa, leka hættulegra efna, aðstoðar við sjúkrabíl, elds í rusli og gróðri og annarrar aðstoðar við fyrirtæki og stofnanir.

## Slökkvilið

Bílamál slökkviliðs eru sífellt í endurskoðun. Endurnýjunar er þörf á einum þjónustubíl. Slökkvilið og garðyrkjudeild þjónustumiðstöðvarinnar/áhaldahússins eru með sameiginlegan sendibíl og skiptist notkunin þannig að slökkviliðið er með bílinn í átta mánuði og garðyrkjudeildin í fjóra mánuði. Seldur var Volvo körfubíll árg 1981 til slökkviliðsins á Blönduósi. Fenginn var að láni Scania körfubíll frá slökkviliði höfuðborgarsvæðisins, sem er mun öflugri og nýrri en sá sem seldur var. Einnig var Toyota þjónustubíll seldur og í staðinn var keypt Tesla Y rafmagnsbíll.

Slökkvilið fékk á árinu afnot af æfingahúsnæði, gamla hesthúsið á Hauganesi. Þar hafa þjálfarar útbúið þrautabraut innandyra. Það er til mikilla bóta að æfa innandyra yfir veturinn. Allar útstöðvar koma til æfinga í þetta húsnæði. Miklir möguleikar eru fyrir hvað varðar æfingar, bæði inni í húsinu og uppi á þaki.

Viðhald á bílum er stór kostnaður á hverju ári. Allir bílar slökkviliðsins eru að eldast og brýnt er að ráðast í innkaup á nýjum eða notuðum 10-12 tónna vatnstankbíl. Þetta verður bíll númer eitt í gróðureldum sem eru alltaf að verða stærri ógn. Kaupin eru komin inn á framkvæmdaáætlun. Slökkviliðsstjóri leggur til að svona bíll verði keyptur árið 2026.

Nokkur vinna var hjá slökkviliði vegna skolonar eftir miklar rigningar og aursöfnun á Flateyri. Var vatnstankur þar skolaður að innan. Aðstoð við Orkubú Vestfjarða vegna vatnleysis, einnig á Flateyri.

Öll tjaldsvæðin á svæði slökkviliðsins eru með 25 lítra léttvatnsslökkvitæki á hjólum og eru ferðamenn mjög svo ánægðir, alltaf eru einhverjir gestir sem geta brugðist við ef óhapp verður.

Áramótabrennur voru á okkar starfssvæði. Eingöngu er brennt hreint timbur og við skoðun á nýársdag brunnu brennurnar vel, veður var mjög gott um kvöldið. Allir bæjarkjarnar hjá Ísafjarðarbæ hafa sínu brennu.

## Sjúkraflutningar

Lítilsháttar fjölgun var á árinu í sjúkraflutningum.

506 flutningar voru á árinu.

- F-1 útkall í hæsta forgangi: 78
- F-2 útkall á forgangi: 92
- F-3/F-4 almennir sjúkraflutningar: 336

Læknir frá Heilbrigðisstofnun Vestfjarða kemur með í flest F-1 forgangsútköll. Slökkvilið þakkar læknum á heilbrigðisstofnuninni fyrir þeirra framlag til sjúkraflutninga á árinu.

Öll útköll hjá slökkviliði, sjúkrabílum og vettvangsliðum fara í gegnum Neyðarlínu 112.

Fjöldi sjúkraflutninga á sjúkrabíl á Þingeyri voru 27.

Skíðavikan, Fossavatns-skíðagangan og Hlaupahátíðin á Vestfjörðum eru stórar hátíðir á svæði slökkviliðsins, er þá sett inn auka bakvakt á sjúkrabíl.

Einnig er sett inn aukavakt þegar að farþegafjöldi frá skemmtiferðaskipum fer yfir 6000 farþega í bænum á sama degi.

## Lokaorð

Margar áskoranir eru fyrir Slökkvilið Ísafjarðarbæjar en fjármálin eru þar stærst. Forgangsráða þarf nokkrum sinnum yfir árið.

Reglugerðabreytingar sem koma reglulega frá Húsnæðis- og mannvirkjastofnun vegna mála sem snúa beint að slökkviliðum þarf að uppfylla eftir bestu getu. Einnig eru bundin í kjarasamninga mál sem auka útgjöld slökkviliða, til dæmis símagreiðslur og þrekálag.

Slökkviliðsstjóri, fyrir hönd Slökkviliðs Ísafjarðarbæjar þakkar þeim fjölmörgu sem komu að björgunaraðgerðum á árinu 2024.